

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI KHAMIS : 9 DISEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9, 11, 12, 14 HINGGA NO. 36)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' DR. MOHD KHAIRUDDIN
BIN AMAN RAZALI [KUALA NERUS]**

TARIKH : 09 DISEMBER 2021 (KHAMIS)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI KEWANGAN** menyatakan pendirian dan tindakan pihak Kerajaan berkenaan penurunan unjuran KDNK negara oleh Bank Dunia buat kali kedua berturut-turut daripada 4.5 kepada 3.3 peratus pada akhir September baru-baru ini.

JAWAPAN

Tuan Yang di-Pertua,

Peningkatan kes harian baharu COVID-19 yang tinggi serta ancaman varian baharu telah mendorong kerajaan untuk melaksanakan total lockdown dengan izin bermula 1 Jun 2021. Situasi ini telah menyebabkan **KDNK suku ketiga 2021 menguncup sebanyak 4.5 peratus** dan menjejaskan momentum pertumbuhan ekonomi secara keseluruhan pada tahun 2021.

Justeru, **unjuran pertumbuhan ekonomi tahun 2021 telah disemak semula kepada antara 3 hingga 4 peratus**, iaitu lebih rendah berbanding anggaran awal antara 6 hingga 7.5 peratus. **Ini sejajar dengan jangkaan oleh agensi antarabangsa** seperti Bank Dunia yang menjangkakan ekonomi Malaysia pada tahun 2021 berkembang sebanyak 3.3 peratus dan 3.5 peratus oleh Tabung Kewangan Antarabangsa (IMF).

Semakan semula unjuran KDNK ini mengambil kira faktor-faktor berikut:

Pertama : **Pembukaan sektor ekonomi dan penyambungan semula aktiviti sosial pada suku keempat 2021** di mana hampir semua negeri kini berada pada fasa terakhir Pelan Pemulihan Negara (atau PPN);

Kedua : **Kemajuan dan keberkesanan pelaksanaan Program Imunisasi COVID-19 Kebangsaan (atau PICK)**. Kepantasan pelaksanaan PICK sehingga berupaya mencapai purata 440,000 dos sehari pada bulan Ogos merupakan antara yang ter pantas di dunia; dan

Ketiga : **Kebenaran untuk merentas negeri pada 11 Oktober 2021** setelah kadar populasi dewasa yang lengkap divaksin melebihi 90 peratus **telah meningkatkan permintaan domestic**

dan memberi kesan limpahan ke atas ekonomi serta mendorong sentiment positif dalam kalangan perniagaan dan pengguna.

Tuan Yang di-Pertua,

Trend pemulihan ekonomi telah dapat dilihat di mana **ekonomi negara telah berkembang sebanyak 3 peratus pada sembilan bulan pertama tahun 2021** berbanding penguncupan sebanyak 6.4 peratus pada tempoh yang sama pada tahun sebelumnya.

Peningkatan prestasi ekonomi ini menunjukkan **keberkesanan inisiatif proaktif Kerajaan melalui pelaksanaan empat pakej bantuan dan rangsangan ekonomi tambahan pada tahun 2021** bagi mengimbangi impak negatif langkah pembendungan pandemik ke atas ekonomi, menjana semula aktiviti ekonomi dan membantu rakyat yang terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 9 DISEMBER 2021 (KHAMIS)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI PERTANIAN DAN INDUSTRI MAKANAN** menyatakan bilangan usahawan wanita yang terlibat dalam bidang pertanian dan penternakan serta apakah langkah yang diambil bagi membantu mereka yang terjejas akibat pandemik COVID-19.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan statistik yang dikeluarkan oleh pihak Jabatan Perangkaan Malaysia (DOSM), bilangan wanita yang terlibat dengan industri pertanian, perhutanan, penternakan dan perikanan bagi tahun 2019 adalah seramai 192,000 orang. Daripada jumlah tersebut 87,030 adalah usahawan wanita bimbingan Kementerian Pertanian dan Industri Makanan (MAFI) melalui Jabatan Pertanian yang terlibat dengan aktiviti pertanian dan industri asas tani (IAT) serta 2,727 usahawan wanita bimbingan MAFI melalui Jabatan Perkhidmatan Veterinar bagi industri ternakan.

Pelbagai langkah dan inisiatif telah diambil oleh MAFI sejak bermula pandemik Covid-19 bagi membantu petani dan penternak serta usahawan IAT yang terkesan dengan situasi pandemik Covid-19 di Malaysia. Bagi tahun 2021, MAFI telah meluluskan sebanyak 10 projek pembangunan berjumlah RM29 juta melibatkan bantuan insentif seperti baja, racun, benih, peralatan kecil pertanian dan infrastruktur asas ladang melalui Jabatan Pertanian bagi membantu petani meneruskan aktiviti pengeluaran.

Selain itu, MAFI juga menyediakan bantuan kepada usahawan IAT melalui geran pepadanan *Change Upgrade Product* (CUP) pada kadar 70:30 di mana 70% adalah ditanggung oleh Kerajaan manakala 30% adalah di bawah tanggungan usahawan dengan nilai maksimum geran adalah sebanyak RM60,000.

MAFI menerusi Jabatan Perkhidmatan Veterinar juga menyediakan beberapa insentif serta bantuan untuk membantu semua penternak tanpa mengira jantina yang terjejas akibat Covid-19, seperti:

- i. Pemberian insentif di bawah Rancangan Malaysia Kedua Belas (RMK-12) seperti Skim Rezeki Ternak Ruminan dan Unggas serta Program Peningkatan Pengeluaran Tenusu Negara yang

bertujuan untuk membantu penternak membeli ternakan dan input-input penternakan;

- ii. Bantuan kepada golongan penternak muda menerusi Program Agropreneur Muda dengan had bantuan RM20,000 bagi setiap peserta dalam bentuk barangan dan tidak perlu dibayar balik;
- iii. Perkhidmatan sokongan teknikal oleh kakitangan lapangan DVS kepada ladang-ladang penternak yang terjejas sepanjang tempoh pelaksanaan Perintah Kawalan Pergerakan (PKP). Aktiviti-aktiviti seperti rawatan ternakan, kesihatan gerompok, kawalan penyakit, khidmat nasihat teknikal pengembangan dan lain-lain perkhidmatan lapangan terus berjalan melalui petugas barisan hadapan DVS di Pusat Pengembangan Veterinar (VetEC) dan Pejabat Perkhidmatan Veterinar Daerah;
- iv. Meneruskan perkhidmatan kesemua 39 buah Pusat Pengumpulan Industri Tenusu (PPIT) di seluruh negara sepanjang tempoh PKP bagi menerima penghantaran susu oleh penternak;
- v. Mengeluarkan sebanyak 43,029 surat kebenaran merentas daerah dan negeri dalam tempoh 1 Mac 2020 hingga 11 Oktober 2021 kepada penternak bagi memudahkan pergerakan dan membolehkan bidang usaha mereka terus beroperasi semasa tempoh PKP seterusnya hasil ternakan dapat dipasarkan kepada pengguna; dan
- vi. Bekerjasama dengan Lembaga Pemasaran Pertanian Persekutuan (FAMA) untuk mendidik penternak bagi meningkatkan kebolehpasaran dan kebolehdapatan hasil ternakan melalui platform pemasaran e-dagang yang bersesuaian seperti Agrobazaar online, yang seterusnya dapat meningkatkan kadar jualan dan pendapatan usahawan ternakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : DR. ONG KIAN MING [BANGI]

TARIKH : 09 DISEMBER 2021 (KHAMIS)

SOALAN

DR. ONG KIAN MING [BANGI] minta **MENTERI KEWANGAN** menyatakan jumlah kes yang melibatkan tuntutan insurans kenderaan dalam tahun 2018,2019, 2020 and 2021 (terkini) yang telah dan sedang dikendalikan oleh *Ombudsman for Financial Services* (OFS) dan langkah-langkah yang sedang diambil untuk memperkukuhkan hak pengguna dalam isu ini.

JAWAPAN

Tuan Yang di-Pertua,

Sepanjang 16 tahun yang lalu, ***Ombudsman for Financial Services (OFS)*** telah membantu menyelesaikan hampir **30,000 pertikaian kewangan**. Ia menjimatkan kos dan masa bagi kedua-dua pihak pengguna dan penyedia perkhidmatan kewangan (*financial services provider*, FSP) berbanding dengan kos kira-kira RM15,000 untuk menyelesaikan kes melalui prosiding mahkamah. Anggaran penjimatan kumulatif adalah sebanyak RM450 juta.

Sebanyak **673 kes pertikaian melibatkan tuntutan insurans/takaful kenderaan** telah diterima oleh OFS sejak tahun 2018 sehingga kini

- Dengan **170 kes** diterima pada tahun **2018**;
- **238 kes** pada tahun **2019**;
- **147 kes** pada tahun **2020**; dan
- **118 kes** diterima bagi tahun ini sehingga 31 Oktober 2021.

Secara keseluruhannya, **sebanyak 734 kes daripada 972 kes pertikaian yang telah diselesaikan (75%)** oleh OFS bagi tahun 2018 sehingga 31 Oktober 2021.

Antara langkah-langkah yang telah diambil OFS untuk memperkukuhkan hak pengguna adalah:

Pertama : **Meningkatkan kerjasama semua pihak termasuk syarikat insurans/ pengendali takaful, penyelaras kerugian, pengendali trak tunda dan bengkel pembaikan kenderaan** bagi meningkatkan tahap ketelusan dan kecekapan dalam memproses tuntutan insurans/ takaful kenderaan.

Kedua : **Pelaksanaan inisiatif-inisiatif untuk mengurangkan tempoh masa** yang diperlukan bagi penyelesaian tuntutan insurans/ takaful kenderaan, seperti **ketersediaan maklumat mengenai harga alat ganti** kenderaan dalam pangkalan data industri.

Ketiga : Peningkatan tahap kompetensi dan kemampuan penyiasaan syarikat insurans/ pengendali takaful.

Keempat : **Peringatan BNM kepada syarikat insurans/ pengendali takaful untuk menggunakan sebut harga yang tepat** sebagaimana dalam ISM Automobile Business Intelligence System (ISMABI) atau sistem penilaian pasaran kenderaan bermotor lain yang diluluskan oleh Persatuan Insurans Am Malaysia.

Kelima : **Pendidikan secara berterusan melalui Program Bijak Kewangan dan risalah Panduan Tuntutan Kemalangan Kenderaan Bermotor** supaya dapat memahami perlindungan yang diperuntukkan dalam polisi insurans/ takaful serta mengelakkan kekeliruan dalam proses tuntutan insurans/ takaful di antara pengguna dan syarikat insurans/ pengendali takaful.

Keenam : BNM dan industri akan **memperkenalkan saluran penyelesaian aduan** bagi membolehkan pengguna dan bengkel insurans untuk menyelesaikan pertikaian tuntutan insurans/ takaful kenderaan dengan syarikat insurans/ takaful melalui penilaian bebas dan efektif.

Ketujuh : BNM juga akan memperkenalkan **keperluan baharu bagi meningkatkan standard profesionalisme di kalangan penyelaras kerugian dalam industri insurans/ takaful** bagi meningkatkan kualiti laporan penyelaras kerugian yang lebih adil dan saksama untuk pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB DR. AZMAN BIN ISMAIL [KUALA KEDAH]

TARIKH : 9 DISEMBER 2021 (KHAMIS)

SOALAN

Minta **MENTERI PENGAJIAN TINGGI** menyatakan usaha-usaha Kementerian untuk memastikan bahawa kualiti graduan tidak terjejas akibat daripada penutupan IPTA yang lama akibat daripada pandemik. Bagaimanakah Kementerian memastikan bahawa usaha-usaha itu berjaya mencapai matlamatnya.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa mengambil berat terhadap kualiti graduan dan keberkesanan sesi pengajaran dan pembelajaran (PdP) khususnya semasa pandemik COVID-19. Bagi memastikan kelangsungan pembelajaran, fokus yang dilaksanakan oleh KPT adalah:

- i. **Penyediaan platform komunikasi yang baik** bagi sesi PdP. Bagi maksud ini, Institusi Pendidikan Tinggi (IPT) telah mengoptimumkan penggunaan platform Learning Management System (LMS), Open Educational Resources (OER), Open Course Ware (OCW), Massive Open Online Courses (MOOCs) untuk memastikan sesi

pembelajaran secara dalam talian dapat dijalankan dengan berkesan;

- ii. Dalam konteks untuk memastikan PdP lebih berkesan, maka **Pembangunan kandungan modul pembelajaran yang berkualiti**. Kementerian melalui Unit Jaminan Kualiti di Universiti Awam dan Majlis Ketua Penyelaras e-Pembelajaran IPTA Malaysia (MEIPTA) memantau secara dekat kualiti modul pembelajaran dalam talian dan keberkesanan sesi PdP yang dijalankan. Penambahbaikan secara berterusan turut dilaksanakan terhadap kandungan dan kaedah penyampaian;
- iii. Dalam suasana pembelajaran berasaskan teknologi, **bantuan kemudahan peranti dan pelan data kepada pelajar secara bersasar** juga telah disediakan oleh pihak Kementerian, IPT dan Yayasan Tunku Abdul Rahman (YTAR).
- iv. Selain itu, untuk memastikan kualiti pensyarah, **keupayaan dan kemahiran pensyarah mengendalikan sesi PdP ditingkatkan**. Kementerian melalui IPT melaksanakan latihan peningkatan kapasiti secara berterusan kepada pensyarah sepanjang tahun bagi peningkatan kemahiran pengajaran secara dalam talian.
- v. Bagi memberi fleksibiliti kepada IPT berhubung Pengendalian Program Pendidikan Tinggi Semasa dan Pasca Perintah Kawalan Pergerakan, KPT melalui MQA telah mengeluarkan beberapa garis panduan atau Advisory Note berhubung **Pelaksanaan Pembelajaran dan Pengajaran Semasa dan Pasca COVID-19** iaitu berkaitan dengan Fleksibiliti Pengendalian Program Pendidikan Tinggi semasa Perintah Kawalan Pergerakan. Garis panduan ini adalah penting untuk memastikan penilaian dan kaedah pembelajaran dapat terus dilaksanakan dengan berkesan tanpa mengabaikan kualiti dan hasil pembelajaran yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA HAJAH
AZIZAH BINTI DATUK SERI PANGLIMA
HAJI MOHD DUN [BEAUFORT]**

TARIKH : 9 DISEMBER 2021 (KHAMIS)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]** minta **MENTERI TENAGA
DAN SUMBER ASLI** menyatakan perancangan Kementerian
menggunakan tenaga solar atau angin sebagai tenaga alternatif bagi
menjana tenaga elektrik di Sabah yang sering mengalami gangguan
bekalan elektrik.

JAWAPAN

Tuan Yang di-Pertua,

1. Selain usaha memperkukuhkan keupayaan penjanaan dan infrastruktur pembekalan elektrik dalam usaha untuk mengurangkan gangguan bekalan elektrik di Sabah, Kerajaan telah meluluskan pembangunan loji jana kuasa solar di bawah Program Solar Berskala Besar atau *Large Scale Solar* (LSS). Sebanyak sepuluh (10) pemaju dengan jumlah kapasiti sebanyak 63.9 Megawatt (MW) dijangka menandatangani perjanjian jual beli tenaga (PPA) dengan Sabah Electricity Sdn. Bhd. (SESB) sebelum penghujung tahun ini. Kesemua projek ini dijadualkan siap dalam masa dua tahun selepas perjanjian tersebut ditandatangani.

2. Berhubung cadangan pembangunan sumber angin sebagai alternatif bagi penjanaan tenaga elektrik di negeri Sabah, Kerajaan telah pun melaksanakan satu kajian bagi mengenal pasti potensi tenaga angin di seluruh negara termasuk di negeri Sabah. Walau bagaimanapun, hasil kajian tersebut menunjukkan bahawa kawasan yang berpotensi untuk penjanaan tenaga angin di Sabah tidak terletak di kawasan yang mengalami kekurangan bekalan elektrik. Selain itu, cadangan penggunaan tenaga angin bagi mengatasi masalah gangguan bekalan elektrik di negeri Sabah bukanlah satu cadangan yang sesuai dan ekonomik untuk dilaksanakan buat masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 9 DISEMBER 2021 (KHAMIS)

SOALAN

Minta **MENTERI PENGAJIAN TINGGI** menyatakan sebarang jalinan kerjasama antara pihak universiti bersama kumpulan industri bagi meningkatkan tahap kebolehpasaran siswazah serta padanan pekerjaan dalam pasaran pekerjaan di Malaysia.

JAWAPAN

Tan Sri Yang di-Pertua,

Kementerian Pengajian Tinggi (KPT) telah mewujudkan pelbagai jalinan kerjasama antara pihak industri dan universiti bagi meningkatkan tahap kebolehpasaran siswazah serta padanan pekerjaan dalam pasaran pekerjaan di Malaysia. Antara program yang telah dilaksanakan dengan jalinan industri adalah:

- i. **Program Industry@University** yang bertujuan untuk mewujudkan prasarana dan memperkasa pembelajaran dan penyelidikan menggunakan digital terkini terutamanya berkaitan IR 4.0 disamping perkongsian ilmu, kemahiran dan teknologi terkini dengan agensi kerajaan, industri dan masyarakat;
- ii. **Program University Revolution Teaching Factory (URTF) MTUN** pula adalah penjenamaan semula bagi konsep kilang pengajaran (*Teaching Factory*) di mana, sistem pembelajaran akan

distrukturkan dengan penjadualan supaya pelajar terlibat secara langsung dalam operasi *Teaching Factory* di MTUN untuk menghasilkan produk tertentu. Dengan ini, pelajar akan didedahkan kepada soft skills seperti pengurusan, penyeliaan, pentadbiran, pemasaran, kewangan yang diperlukan dalam tenaga kerja; dan

- iii. **Program Makers@University** adalah bagi mewujudkan ruangan khusus bagi menggarap cetusan idea inovasi dan memberikan peluang serta pengalaman *hands on* kepada mahasiswa IPT dalam melahirkan idea-idea inovatif dan kreatif. Ruangan ini akan berfungsi sebagai platform untuk bertukar pandangan berkaitan kepelbagaian teknologi melalui medium-medium pemindahan teknologi.

Melalui Jabatan Pendidikan Politeknik dan Kolej Komuniti pula, KPT telah menubuhkan Majlis Penasihat Industri yang merupakan platform peneraju kepada industri untuk memberikan maklum balas dan cadangan yang berkaitan dengan penambahbaikan ekosistem TVET.

Selain itu, Kementerian turut melaksanakan program padanan pekerjaan kepada graduan melalui Portal *Graduates Reference Hub for Employment and Training* atau ringkasnya melalui Modul *Jobmatching@GREaT* sebagai platform untuk memudahkan pihak industri mengenal pasti graduan yang memenuhi kriteria dan keperluan untuk ditawarkan peluang pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
(JERANTUT)**

TARIKH : 9 DISEMBER 2021 (KHAMIS)

SOALAN

DATO' HAJI AHMAD NAZLAN BIN IDRIS (JERANTUT) minta **MENTERI KANAN PENDIDIKAN** menyatakan sejauh mana tindakan yang akan diambil oleh Kementerian ke atas guru-guru yang enggan divaksin boleh dicabar di mahkamah dan apakah perancangan Kementerian untuk memperhalusi perkara ini supaya tidak timbul isu lain serta apa perancangan Kementerian berkenaan isu yang sama di sekolah swasta.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk menyediakan persekitaran sekolah yang selamat bagi pengajaran dan pembelajaran (PdP) secara bersemuka. Dalam hal ini, KPM sentiasa memantau rapi status vaksinasi warga sekolah termasuk guru, anggota kumpulan pelaksana dan pekerja sokongan sekolah.

Guru adalah penjawat awam yang tertakluk kepada peraturan yang dikeluarkan oleh Jabatan Perkhidmatan Awam (JPA). Oleh itu, KPM akan mengambil tindakan sewajarnya berdasarkan Pekeliling Perkhidmatan Bilangan 4 Tahun 2021 yang disediakan oleh JPA. Selaras dengan pekeliling tersebut, KPM akan memastikan guru yang enggan divaksin perlu melengkapkan vaksinasi kecuali mereka yang mendapat pengesahan daripada pengamal perubatan berdaftar. Sekiranya guru tersebut masih gagal mematuhi arahan ini, mereka boleh dikenakan tindakan tatatertib.

Pada masa yang sama, KPM secara berterusan mengadakan konsultasi untuk memastikan semua guru menerima vaksin. KPM turut melaksanakan pelbagai program kesedaran vaksinasi melalui sesi libat urus, serta pendekatan secara berhemah seperti pujukan oleh bahagian, jabatan pendidikan negeri dan pejabat pendidikan daerah. Guru yang tidak boleh divaksin atas sebab kesihatan perlu mengemukakan maklumat kesihatan yang telah disahkan oleh pegawai perubatan kerajaan kepada Ketua Jabatan masing-masing.

Bagi guru yang berkhidmat di institusi pendidikan swasta yang berdaftar dengan KPM, mereka perlu mematuhi garis panduan berkaitan vaksinasi yang ditetapkan oleh KPM dalam Garis Panduan Pengurusan dan Pengoperasian Sekolah 3.0. Walau bagaimanapun, tindakan ke atas guru di institusi berkenaan yang enggan divaksin tertakluk kepada keputusan pentadbiran institusi masing-masing.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 09 DISEMBER 2021 (KHAMIS)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan berapa pembayar cukai individu menuntut pelepasan cukai Borang B dan BE bagi kategori berikut :-

- (a) insurans nyawa dan KWSP dengan setiap ribu satu banjaran sehingga syiling RM7000; dan
- (b) insurans pendidikan dan perubatan dengan setiap ribu satu banjaran sehingga syiling RM3000.

JAWAPAN

Tuan Yang di-Pertua,

Untuk makluman Ahli Yang Berhormat, bilangan pembayar cukai yang menuntut pelepasan insuran nyawa dan KWSP melalui Borang B dan BE berdasarkan banjaran setiap ribu sehingga maksimum RM7,000 adalah seperti berikut:

- a. Bagi amaun tuntutan sehingga seribu ringgit, sebanyak 52,677 pembayar cukai menuntut melalui Borang B dan sebanyak 138,489 pembayar cukai menuntut melalui Borang BE;
- b. Bagi amaun tuntutan melebihi seribu ringgit hingga dua ribu ringgit, sebanyak 55,721 pembayar cukai menuntut melalui Borang B dan sebanyak 161,232 pembayar cukai menuntut melalui Borang BE;
- c. Bagi amaun tuntutan melebihi dua ribu ringgit sehingga tiga ribu ringgit, sebanyak 135,867 pembayar cukai menuntut melalui Borang B dan sebanyak 225,394 pembayar cukai menuntut melalui Borang BE;
- d. Bagi amaun tuntutan melebihi tiga ribu ringgit sehingga empat ribu ringgit, sebanyak 40,662 pembayar cukai menuntut melalui Borang B dan sebanyak 596,359 pembayar cukai menuntut melalui Borang BE;
- e. Bagi amaun tuntutan melebihi empat ribu ringgit sehingga lima ribu ringgit, sebanyak 29,727 pembayar cukai menuntut melalui Borang B dan sebanyak 239,812 pembayar cukai menuntut melalui Borang BE;
- f. Bagi amaun tuntutan melebihi lima ribu ringgit sehingga enam ribu ringgit, sebanyak 28,184 pembayar cukai menuntut melalui Borang B dan sebanyak 231,630 pembayar cukai menuntut melalui Borang BE; dan

- g. Bagi amaun tuntutan melebihi enam ribu ringgit sehingga tujuh ribu ringgit, sebanyak 81,228 pembayar cukai menuntut melalui Borang B dan sebanyak 692,777 pembayar cukai menuntut melalui Borang BE.

Manakala bagi bilangan pembayar cukai yang menuntut pelepasan insuran Pendidikan dan perubatan melalui Borang B dan BE berdasarkan banjaran setiap ribu sehingga maksimum RM3,000 adalah seperti berikut:

- a. Bagi amaun tuntutan sehingga seribu ringgit, sebanyak 27,918 pembayar cukai menuntut melalui Borang B dan sebanyak 146,982 pembayar cukai menuntut melalui Borang BE;
- b. Bagi amaun tuntutan melebihi seribu ringgit sehingga dua ribu ringgit, sebanyak 73,409 pembayar cukai menuntut melalui Borang B dan sebanyak 324,118 pembayar cukai menuntut melalui Borang BE; dan
- c. Bagi amaun tuntutan melebihi dua ribu ringgit sehingga tiga ribu ringgit, sebanyak 270,748 pembayar cukai menuntut melalui Borang B dan sebanyak 1,042,120 pembayar cukai menuntut melalui Borang BE.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SRI HAJAH ROHANI BINTI
HAJI ABDUL KARIM [BATANG LUPAR]**

TARIKH : 9 DISEMBER 2021 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI PEMBANGUNAN WANITA, KELUARGA DAN MASYARAKAT** menyatakan tentang perancangan Kementerian membantu dalam penyediaan pembantu penjaga kanak-kanak dari rumah klien berbanding di pusat jagaan, memandangkan trend ibu bapa lebih memilih penjagaan di rumah bagi mengelak risiko COVID-19 dan anak-anak menjalani PdPR.

JAWAPAN

Tuan Yang di-Pertua,

Kementerian ini menyedari bahawa perkhidmatan penyediaan pengasuh kanak-kanak dari rumah klien merupakan satu pendekatan baharu dalam bidang pengasuhan atau penjagaan di Malaysia disebabkan terdapatnya permintaan terhadap perkhidmatan tersebut seiring dengan norma baharu akibat pandemik COVID-19.

Melihat kepada situasi tersebut, Kementerian ini telah mula meneliti keperluan dan bidang fungsi agensi yang bersesuaian bagi tujuan pengawalseliaan perkhidmatan ini dengan mengambil kira aspek keselamatan kanak-kanak dan kaedah pelaksanaannya secara berkesan. Ini kerana buat masa ini, Akta Taman Asuhan Kanak-kanak 1984 bagi kanak-kanak bawah umur 4 tahun sahaja dan Akta Pusat Jagaan 1993 di bawah seliaan Jabatan Kebajikan Masyarakat (JKM) hanya memperuntukkan pendaftaran, pengawalan dan pemeriksaan TASKA dan Pusat Jagaan.

Dalam hal ini, Kementerian ini sedang mengadakan sesi libat urus secara berterusan bersama agensi terlibat memandangkan perkara ini memerlukan keputusan dasar untuk menyediakan perkhidmatan pengasuh kanak-kanak di rumah klien sebagai satu sistem sokongan keluarga. Adalah diharap, kerjasama bersepadu ini dapat membuka peluang kepada lebih ramai ibu bapa untuk keluar bekerja khususnya penyertaan golongan wanita dalam pasaran kerja yang boleh memanfaatkan kanak-kanak dan institusi keluarga, sekali gus membantu meningkatkan ekonomi negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN TAN KOK WAI [CHERAS]
TARIKH : 09 DISEMBER 2021 (KHAMIS)

SOALAN

TUAN TAN KOK WAI [CHERAS] minta **MENTERI KEWANGAN** menyatakan setakat ini jumlah hutang tertunggak yang belum dijelaskan oleh semua Kerajaan negeri kepada Kerajaan Persekutuan dan menyatakan jumlah hutang setiap negeri termasuklah pentadbiran Wilayah-wilayah Persekutuan. Apakah langkah-langkah Kerajaan untuk mengutip hutang-hutang tertunggak ini.

JAWAPAN

Tuan Yang di-Pertua,

Untuk makluman Ahli Yang Berhormat, jumlah tunggakan pinjaman Kerajaan Persekutuan oleh Kerajaan Negeri sehingga 31 Oktober 2021 adalah berjumlah RM4.26 bilion seperti berikut:

Tunggakan Pinjaman Mengikut Negeri

Bil.	Negeri	Tunggakan Pinjaman Sehingga 31 Oktober 2021 (RM Juta)
1.	Pahang	1,403.14
2.	Kedah	1,056.55
3.	Melaka	586.62
4.	Negeri Sembilan	375.61

Bil.	Negeri	Tunggakan Pinjaman Sehingga 31 Oktober 2021 (RM Juta)
5.	Kelantan	373.90
6.	Perlis	186.98
7.	Johor	145.12
8.	Terengganu	57.69
9.	Sarawak	43.37
10.	Perak	32.57
11.	Selangor	0.00
12.	Sabah	0.00
13.	P.Pinang	0.00
	JUMLAH	4,261.55

Untuk makluman Ahli Yang Berhormat, Kerajaan Persekutuan tidak mempunyai pinjaman bersama Wilayah-wilayah Persekutuan. Bagi menyelesaikan isu tunggakan pinjaman, Kerajaan Persekutuan dan Kerajaan Negeri sentiasa melaksanakan rundingan/ konsultasi bagi mengenal pasti kekangan kewangan yang dihadapi oleh Kerajaan Negeri dan langkah-langkah pemulihan pinjaman yang boleh dilaksanakan. Antara langkah pemulihan pinjaman yang boleh dilaksanakan adalah melalui penjadualan dan penstrukturan semula pinjaman mengikut kemampuan dan kedudukan kewangan semasa Kerajaan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI IDRIS BIN JUSOH
[BESUT]**

TARIKH : 9 DISEMBER 2021 (KHAMIS)

SOALAN

DATO' SERI HAJI IDRIS BIN JUSOH [BESUT] minta **MENTERI PELANCONGAN, SENI DAN BUDAYA** menyatakan strategi Kementerian dalam melaksanakan pelan pemulihan pelancongan setempat, khasnya dalam usaha pengindahan tebing dan kualiti air sungai di kawasan luar bandar bagi aktiviti rekreasi dan riadah.

JAWAPAN

Tuan Yang di-Pertua,

1. Untuk makluman Ahli Yang Berhormat, sebagai langkah untuk bangkit semula, Kementerian Pelancongan, Seni dan Budaya (MOTAC) melalui beberapa siri konsultasi bersama penggiat industri pelancongan telah membangunkan Pelan Pemulihan Pelancongan atau PPP dalam mencari keseimbangan antara kepentingan ekonomi dan kesihatan awam.
2. PPP merupakan salah satu usaha berterusan MOTAC dalam mengembalikan keyakinan pelancong terhadap tahap keselamatan di sesuatu destinasi pelancongan, selain berusaha untuk memastikan sektor pelancongan negara mampu menjana semula pendapatan secara berterusan selepas pembukaan sektor ini secara berperingkat kelak.
3. Salah satu fokus PPP adalah merancakkan semula pelancongan domestik. Ini termasuklah memastikan lokasi-lokasi pelancongan termasuk persekitaran sungai, tasik, laut berada dalam keadaan baik dan selamat bagi aktiviti rekreasi dan riadah.
4. Untuk makluman Ahli Yang Berhormat, kerja-kerja pengindahan tebing dan kualiti air sungai adalah di bawah bidang kuasa Kementerian Alam Sekitar dan Air (KASA). Walau bagaimanapun, Kementerian ini melalui pejabat-pejabat di setiap negeri sentiasa bekerjasama rapat dengan pelbagai agensi rentas Kementerian seperti Jabatan Pengairan dan Saliran (JPS), Jabatan Kerja Raya (JKR), Jabatan Alam Sekitar (JAS), agensi-agensi Kerajaan Negeri serta juga pihak swasta dan badan bukan Kerajaan (NGO) yang berkaitan dalam memastikan setiap kawasan rekreasi dan riadah sentiasa selamat untuk dikunjungi.

5. Sebagai contoh, MOTAC pernah menjalin kerjasama dengan Perbadanan Pembangunan Sungai dan Pantai Melaka, iaitu pihak yang mengusahakan *Melaka River Cruise*, dalam melaksanakan Program Gotong Royong Voluntourism Cintailah Sungai Melaka bagi memastikan sungai yang menjadi tarikan pelancong dipelihara keindahan dan kebersihannya. Di samping itu juga, pihak MOTAC juga telah mengadakan *Program Voluntourism* bersama Angkatan Pertahanan Awam Malaysia (APM) di Pantai Pengkalan Balak, Melaka.

6. Sementara itu, Kementerian Sumber Asli dan Alam Sekitar (KASA) memaklumkan, KASA telah menyasarkan penyediaan denai sungai sepanjang 10,000 kilometer di seluruh negara menjelang 2030 menerusi inisiatif Denai Sungai Kebangsaan (DSK) dengan objektif menggalakkan penglibatan orang awam dalam usaha pemeliharaan kualiti air sungai dan mencegah pencemaran.

7. Inisiatif ini melibatkan aktiviti pengindahan tebing sungai untuk dijadikan kawasan riadah dan tumpuan orang awam yang mana secara tidak langsung akan mencegah kemungkinan pencemaran sungai oleh pihak-pihak yang tidak bertanggungjawab. Selain itu, JAS juga telah memperkenalkan program pengawasan kualiti air oleh komuniti setempat bagi membolehkan masyarakat tempatan memantau kualiti sungai di kawasan mereka dan melaporkan kepada JAS sekiranya berlaku perubahan pada kualiti air sungai. Program ini juga dirangka dengan tujuan untuk memupuk rasa kebertanggungjawaban untuk memelihara kualiti air sungai yang diselia oleh komuniti tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN (MUAR)**

TARIKH : 9 DISEMBER 2021 (KHAMIS)

SOALAN

TUAN SYED SADDIQ BIN SYED ABDUL RAHMAN (MUAR) minta **MENTERI KANAN PENDIDIKAN** menyatakan kaedah yang digunakan untuk menentukan bilangan peranti laptop yang diagihkan ke setiap kawasan Parlimen seluruh Malaysia. Bagaimanakah cara pemilihan sekolah dibuat. Di Parlimen Muar hanya dua buah sekolah sahaja yang menerima peranti dari Kerajaan

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital kepada murid B40 yang dikenal pasti.

Yayasan Hasanah menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti digital ke pejabat pendidikan daerah (PPD). Manakala, Kementerian

Pendidikan Malaysia (KPM) bertanggungjawab untuk mengenal pasti murid B40 yang layak menerima peranti digital mengikut kriteria yang ditetapkan dan seterusnya menguruskan agihan peranti digital tersebut.

Penentuan bilangan peranti digital yang diagihkan kepada murid B40 dan pemilihan sekolah adalah berdasarkan kepada kriteria yang ditetapkan seperti berikut.

- i) murid B40 yang dikenal pasti di sekolah bawah KPM;
- ii) senarai sekolah rendah disusun mengikut kedudukan bilangan murid B40 tertinggi bagi kohort Tahun Empat di setiap PPD;
- iii) senarai sekolah menengah disusun mengikut kedudukan bilangan murid B40 tertinggi bagi kohort Tingkatan Tiga di setiap PPD;
- iv) pemilihan sekolah di setiap PPD dibuat dengan mengambil kira keseimbangan lokasi sekolah di kawasan bandar dan luar bandar serta kemudahan capaian Internet dan bekalan elektrik di kawasan sekitarnya;
- v) bagi sekolah yang terpilih, setiap murid B40 dalam kohort Tahun Empat di sekolah rendah atau kohort Tingkatan Tiga di sekolah menengah akan menerima peranti digital Tabung CERDIK.

Untuk makluman Ahli Yang Berhormat, pengagihan peranti digital dibuat berdasarkan sekolah yang memenuhi kriteria di setiap PPD. Di PPD Muar, terdapat tiga (3) kawasan parlimen iaitu Parlimen Muar, Parlimen Bakri dan Parlimen Pagoh. Sebanyak 1,202 peranti digital telah diagihkan kepada murid B40 di 16 buah sekolah di PPD Muar termasuk dua (2) buah sekolah di Parlimen Muar yang memenuhi kriteria mengikut susunan keutamaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJI MOHD ANUAR MOHD
TAHIR (TEMERLOH)**

TARIKH : 9 DISEMBER 2021 (KHAMIS)

SOALAN

DATUK WIRA HAJI MOHD ANUAR MOHD TAHIR minta **MENTERI KANAN PENDIDIKAN** menyatakan status kuarters pendidikan guru yang telah terbiar dan usang akibat tiada penggunaan. Pada 2019 telah dilaporkan Kementerian mempunyai sebanyak 50,257 unit kuarters di seluruh Malaysia, sebanyak 33,893 unit atau 67.44 % sedang diduduki sementara 16,364 unit atau 32.56 % lagi adalah kuarters kosong. Sebanyak 10,062 unit kuarters kosong pula berada dalam keadaan yang rosak dan tidak boleh dihuni. Tidakkah Kementerian berusaha untuk mengubah guna fungsi kuarters-kuarters ini kepada pusat-pusat latihan guru, pusat sumber, asrama pelajar-pelajar tingkatan 6, dan sebagainya, malah disewakan kepada agensi Kerajaan lain.

JAWAPAN

Tuan Yang di-Pertua,

Untuk makluman Ahli Yang Berhormat, sebagai langkah mengoptimumkan penggunaan kuarters, Kementerian Pendidikan Malaysia (KPM) telah menubuhkan *task force* yang bertindak merangka strategi dan pelan tindakan menyeluruh bagi menangani isu kuarters yang tidak didiami. Antara tindakan yang telah diambil bagi mengoptimumkan kekosongan kuarters adalah seperti berikut:

- i. bekerjasama dengan semua agensi kerajaan dengan menawarkan kuarters kosong tersebut menjadi kuarters kakitangan kepada kementerian dan agensi yang berminat;
- ii. menukar fungsi kuarters kosong kepada Pusat Latihan Guru Dalam Perkhidmatan;
- iii. menawarkan sewaan kepada pihak swasta dan koperasi yang berminat untuk dijadikan asrama untuk pelajar atau pekerja; dan
- iv. menyelenggara dan membaiki kuarters guru yang rosak supaya dapat didiami, terutamanya di kawasan-kawasan bandar seperti Kuala Lumpur dan Pulau Pinang.

Sepanjang tahun 2021, sebanyak 21 unit kuarters guru telah diluluskan tukar fungsi kepada taska, bilik pengajaran dan pembelajaran, galeri seni, surau, bengkel, pejabat pentadbiran dan koperasi sekolah.

Selain itu, dari tahun 2011 sehingga 2021, KPM juga telah menyewakan sebanyak 566 unit kuarters kosong kepada pihak agensi awam dan swasta. Daripada jumlah tersebut, sebanyak 478 unit kuarters disewakan kepada universiti awam dan swasta, manakala sebanyak 88 unit kuarters disewakan kepada syarikat swasta. Kuarters yang disewa ini adalah untuk penginapan pelajar dan pekerja.

KPM juga telah meluluskan sebanyak 6 unit kuarters untuk ditukar fungsi untuk dijadikan sebagai pejabat pentadbiran atau operasi Jabatan Pertahanan Awam (JPAM) dan Taska Kemas.

KPM juga bekerjasama dengan kementerian lain dengan membenarkan kakitangan daripada kementerian berkenaan untuk menduduki kuarters KPM. Data sehingga 15 Oktober 2021 sebanyak 352 unit kuarters dihuni oleh kakitangan selain daripada KPM seperti Jabatan Bomba dan Penyelamat Malaysia, klinik kerajaan dan Jabatan Pendidikan Politeknik dan Kolej Komuniti.

Selain itu KPM juga telah melaksanakan tukar Kementerian Jabatan Pengguna (KJP) kuarters kepada MINDEF yang melibatkan Kuarters Institusi Pendidikan (KIP) Bukit Kayu Hitam sebanyak 80 unit untuk tujuan penempatan Rumah Keluarga Angkatan Tentera (RKAT) Batalion-5 Rejimen Sempadan, Kem Bukit Kayu Hitam pada tahun 2015.

KPM akan terus mempergiat usaha untuk memastikan kuarters yang kosong dapat digunakan berdasarkan kepada pelan tindakan yang strategik yang telah dirangka.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT (JERAI)

TARIKH : 9 DISEMBER 2021 (KHAMIS)

SOALAN

TUAN SABRI BIN AZIT (JERAI) minta **MENTERI KANAN PENDIDIKAN** menyatakan adakah Kerajaan bercadang untuk menaikkan pangkat bagi setiap Ahli Jemaah Nazir seperti pangkat Ketua Jemaah Nazir ke Gred Jusa C dan Timbalan Ketua Nazir ke Gred DG54.

JAWAPAN

Tuan Yang di-Pertua,

Untuk makluman Ahli Yang Berhormat, gred jawatan Ketua Nazir adalah Gred Utama B sejak tahun 2005. Mulai tahun 2019, gred jawatan Timbalan Ketua Nazir Kanan adalah Gred Utama C, Timbalan Ketua Nazir adalah Gred DG54 dan Ketua Nazir Negeri adalah Gred DG54 atau DG52.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SYED IBRAHIM BIN SYED NOH [LEDANG]

TARIKH : 9 DISEMBER 2021 (RABU)

SOALAN

TUAN SYED IBRAHIM BIN SYED NOH minta **MENTERI KANAN PENDIDIKAN** menyatakan:-

- (a) perkembangan inisiatif perancangan Kementerian bagi menstrukturkan pendidikan digital dalam kurikulum sekolah; dan
- (b) bentuk kerjasama rentas Kementerian dan peranan masing-masing dalam inisiatif Pelan Pendidikan Digital.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah menetapkan hala tuju pendigitalan negara di bawah Rangka Tindakan (Blueprint) Ekonomi Digital Malaysia (MyDIGITAL), Dasar Revolusi Perindustrian Keempat (4IR) Negara dan pelan Jalinan Digital Negara (JENDELA).

Dalam konteks pendidikan, KPM sedang di peringkat akhir penggubalan Dasar Pendidikan Digital (DPD) yang bermatlamat melahirkan generasi fasih digital dan berdaya saing. DPD juga dirangka bagi memupuk bakat digital yang berpengetahuan, berkemahiran dan beretika dalam penggunaan teknologi digital. DPD disokong dengan pelan tindakan

komprehensif melalui strategi dan inisiatif yang strategik, khususnya dalam aspek pengajaran dan pembelajaran (PdP).

Di bawah kerangka DPD, tumpuan akan diberikan untuk:

- i. meningkatkan penguasaan murid dalam teknologi digital;
- ii. memperkayakan kandungan digital yang berkualiti;
- iii. memperkasakan kompetensi guru;
- iv. membudayakan penggunaan teknologi digital dalam kalangan pemimpin pendidikan;
- v. mengupayakan infostruktur dan infrastruktur digital institusi di bawah KPM; dan
- vi. memperkukuh jalinan strategik.

Untuk makluman Ahli Yang Berhormat, berkaitan kerjasama rentas Kementerian, KPM telah mengadakan jalinan dan jaringan bersama-sama pelbagai kementerian dalam Kluster Bakat Digital bawah Majlis Ekonomi Digital dan 4IR Negara (MED4IRN). Kluster ini diterajui oleh Kementerian Sumber Manusia.

KPM juga telah menubuhkan Kumpulan Kerja Khas (*Special Taskforce* – STF) Penyelarasan Perancangan Digitalisasi Sistem Pendidikan Negara. STF ini dipengerusikan secara bersama-sama oleh Ketua Setiausaha (KSU) KPM, KSU Kementerian Pengajian Tinggi (KPT) dan Ketua Pegawai Eksekutif, MyDIGITAL Corporation. Ahli STF terdiri daripada wakil KPM, KPT, Kementerian Sumber Manusia, Kementerian Komunikasi dan Multimedia, Kementerian Pembangunan Luar Bandar, Unit Perancang Ekonomi, Kementerian Perdagangan Antarabangsa dan Industri serta Kementerian Belia dan Sukan. Melalui STF, KPM dapat mengoptimumkan potensi perkongsian awam swasta dalam memastikan rancangan digitalisasi sistem pendidikan negara ini dilaksanakan dengan berkesan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI (BUKIT BENDERA)

TARIKH : 9 DISEMBER 2021 (KHAMIS)

SOALAN

TUAN WONG HON WAI minta **MENTERI KANAN PENDIDIKAN** menyatakan usaha pembaharuan undang-undang yang telah atau sedang diusahakan oleh Kementerian Pendidikan sejak Mac 2020 dan bilakah pembaharuan tersebut akan dibentangkan di Parlimen.

JAWAPAN

Tuan Yang di-Pertua,

Untuk makluman Ahli Yang Berhormat, pembaharuan undang-undang merupakan suatu tindakan membaharui undang-undang yang telah lapuk dan tidak lagi relevan. Perkara ini dilaksanakan melalui penelitian terhadap perundangan sedia ada di bawah Akta Pendidikan 1996 [*Akta 550*] dan perundangan subsidiari yang digubal di bawah Akta Pelajaran 1961. Buat masa ini, undang-undang sedia ada masih relevan untuk dirujuk.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 9 DISEMBER 2021 (KHAMIS)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI PENGANGKUTAN** menyatakan bilangan pemegang Lesen Memandu Kompeten atau CDL bagi Kelas B, B1, B2 dan D bagi Warga Emas (berumur 60 tahun dan ke atas) rakyat negara ini dan nyatakan jumlah kes kemalangan jalan raya termasuk yang melibatkan kematian membabitkan pemandu warga emas bagi tempoh lima tahun 5 tahun iaitu dari 2017 hingga terkini 2021.

JAWAPAN

Tuan Yang Di-Pertua,

Sehingga 13 Oktober 2021, jumlah pemegang lesen CDL yang direkodkan di dalam sistem mySIKAP JPJ secara keseluruhan bagi warga emas yang berumur 60 tahun ke atas adalah berjumlah 2,160,458. Statistik ini turut mengambil kira pemegang lesen CDL yang mempunyai pelbagai kelas lesen contohnya memiliki Lesen Memandu Kelas B2 dan D secara bersekali.

Mengikut pecahan kelas lesen pula, sebanyak 1,355,208 adalah pemegang lesen memandu motosikal (Kelas B, B1 dan B2) manakala 1,951,204 adalah bagi Motokar (Kelas D dan DA).

Jumlah kes kemalangan jalan raya yang melibatkan kematian membabitkan pemandu berumur 60 tahun ke atas dari tahun 2017 hingga tahun 2020 adalah sebanyak 3693 kematian ataupun lebih kurang 15% daripada 23,825 kematian bagi tempoh tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG (KOTA MELAKA)

TARIKH : 9 DISEMBER 2021 (KHAMIS)

SOALAN

TUAN KHOO POAY TIONG minta **MENTERI KANAN PENDIDIKAN** menyatakan :

- (a) status laporan oleh Pasukan Petugas Dasar UEC (PPDUEC), termasuk sama ada laporan tersebut telah dimuktamadkan dan dikemukakan kepada Kementerian; dan
- (b) adakah Kementerian yang baharu ini bersetuju untuk mengiktiraf UEC sebagai syarat kemasukan ke IPTA.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak menerima sebarang laporan daripada Pasukan Petugas Dasar *Unified Examination Certificate* (PPDUEC). Berdasarkan terma rujukan PPDUEC, tempoh untuk mengemukakan laporan kajian kepada KPM adalah tiga hingga enam bulan bermula 29 November 2018. Tempoh kajian telah dilanjutkan sebanyak enam kali sehingga ia tamat pada 29 Februari 2020. Walau bagaimanapun, PPDUEC masih belum menyerahkan laporan kajian berkenaan. Memandangkan tempoh kajian tidak dilanjutkan dan telah tamat, maka keanggotaan PPDUEC juga tamat secara automatik pada tarikh yang sama.

Untuk makluman Ahli Yang Berhormat, sehingga kini, KPM kekal tidak mengiktiraf UEC berlandaskan peruntukan Akta Pendidikan 1996 [*Akta 550*] dan Dasar Pendidikan Kebangsaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 09 DISEMBER 2021 (KHAMIS)

SOALAN

DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan jumlah yang dibayar kepada perunding asing oleh Kerajaan bagi setiap tahun 2014 hingga terkini.

JAWAPAN

Tuan Yang di-Pertua,

Untuk makluman Yang Berhormat, pelaksanaan perolehan perkhidmatan perunding asing yang dilaksanakan oleh Kerajaan Malaysia bagi tahun 2019 sehingga 2021 dengan kos kajian yang diluluskan oleh Pihak Berkuasa Melulus (PBM) adalah sebanyak RM27,662,484.31. Tiada perolehan perkhidmatan perunding asing yang dilaksanakan bagi tahun 2014 sehingga 2018. Untuk makluman Yang Berhormat, Pihak Berkuasa Melulus (PBM) bagi perolehan perkhidmatan perunding asing adalah Jawatankuasa Penilaian Perunding Asing, Unit Perancang Ekonomi (EPU), Jabatan Perdana Menteri (JPM) selaras dengan Pekeliling Perbendaharaan/Perolehan Kerajaan (PP/PK) 3.1.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISAH MUNIRAH MAJILIS
(KOTA BELUD)**

TARIKH : 9 DISEMBER 2021 (KHAMIS)

SOALAN

PUAN ISNARAISAH MUNIRAH MAJILIS minta **MENTERI KANAN PENDIDIKAN** menyatakan senarai sekolah-sekolah di Kota Belud yang terlibat dalam senarai projek-projek RMK-12.

JAWAPAN

Tuan Yang di-Pertua,

Untuk makluman Ahli Yang Berhormat, pelaksanaan projek di bawah Rancangan Malaysia Ke-12 (RMKe-12) meliputi Rancangan Malaysia Lima Tahun iaitu dari tahun 2021 hingga 2025.

Bagi RMKe-12 *Rolling Plan* 1 (RP1) Tahun 2021, sebanyak 32 projek telah diluluskan di Parlimen Kota Belud dengan kos projek berjumlah RM235.45 juta. Projek yang telah diluluskan merangkumi 26 projek pembinaan bangunan gantian, 1 projek naik taraf bilik darjah menjadi bengkel kemahiran Sijil Kemahiran Malaysia dan 5 projek pembinaan dan pemasangan bekalan air telaga tiub. Sekolah yang terlibat adalah seperti berikut:

- i. SK Kuala Abai;
- ii. SK Tengkurus;
- iii. SK Kelawat;

- iv. SK Pulau Mantanani;
- v. SK Tuguson;
- vi. SMK Arshad;
- vii. SK Pinolobu;
- viii. SK Nahaba;
- ix. SK Pulau Mantanani;
- x. SK Lasau Podi;
- xi. SK Sayap;
- xii. SK Lasau Tintapon;
- xiii. SK Pituru;
- xiv. SK Gensurai;
- xv. SK Tampasuk II;
- xvi. SK Dalas Kota Belud;
- xvii. SK Nanamun;
- xviii. SK Taun Gusi II;
- xix. SMK Agama Tun Said;
- xx. SK Kulambai;
- xxi. SMK Nanaring;
- xxii. SMK Taun Gusi;
- xxiii. SMK Taun Gusi II;
- xxiv. SK Taun Gusi;
- xxv. SMK Tambulion;
- xxvi. SK Labuan;
- xxvii. SK Sarang;
- xxviii. SK Ulu Kukut;
- xxix. SK Ambong;
- xxx. SK Nahaba;
- xxxi. SK Podos; dan
- xxxii. SK Dudar.

Bagi RMKe-12 *Rolling Plan 2* (RP2) tahun 2022, KPM telah diluluskan sebanyak 3 projek baharu di Parlimen Kota Belud melibatkan kos berjumlah RM43.38 juta. Kesemua projek tersebut melibatkan projek pembangunan semula sekolah yang mempunyai bangunan daif.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 9 DISEMBER 2021 (KHAMIS)

SOALAN

TUAN CHANG LIH KANG (TANJONG MALIM) minta **MENTERI KANAN PENDIDIKAN** menyatakan berapa unit RTK-Antigen test kit yang akan atau telah diberikan kepada sekolah melalui PPD. Berapa kos yang terlibat.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa mengutamakan keselamatan serta kesihatan murid bagi memastikan sesi pembelajaran secara bersemuka di sekolah dapat dilaksanakan dalam keadaan teratur dan selamat.

Untuk makluman Ahli Yang Berhormat, pembekalan kit Ujian Kendiri COVID-19 ke sekolah bawah KPM di seluruh negara di peringkat awal adalah bertujuan untuk melaksanakan ujian saringan kepada yang murid bergejala di sekolah dan bagi sekali ujian semasa pendaftaran masuk murid ke asrama sahaja.

Pada September 2021, KPM telah membuat perolehan sebanyak 800,000 unit kit ujian saringan sendiri COVID-19 dengan kos keseluruhan berjumlah RM9.72 juta untuk kegunaan dalam tempoh Oktober hingga Disember 2021. Semua kit ujian saringan sendiri COVID-19 ini telah

SOALAN NO : 31

diedarkan ke semua Pejabat Pendidikan Daerah (PPD) dan Jabatan Pendidikan Negeri (JPN) pada 25 September 2021.

Kuantiti kit yang diagihkan ke sekolah bagi tujuan saringan murid asrama adalah mengikut bilangan murid sesebuah asrama tersebut manakala kuantiti kit yang diagihkan ke sekolah bagi tujuan saringan bergejala adalah berdasarkan julat enrolmen murid seperti berikut:

Julat enrolmen murid	Bilangan kit Ujian Kendiri COVID-19
Bawah 200 orang	20 unit
201-500 orang	40 unit
501-1000 orang	60 unit
1001-2000 orang	80 unit
2000 ke atas	100 unit

Selaras dengan pelaksanaan Strategi Pengujian COVID-19 Kebangsaan- *National COVID-19 Testing Strategy* (NTS) yang dikeluarkan oleh KKM pada 26 November 2021, KPM telah membuat perolehan tambahan sebanyak RM25.55 juta bagi membekalkan anggaran sebanyak 2,323,084 unit kit Ujian Kendiri COVID-19 kepada sekolah rendah. Perbekalan ini bertujuan bagi pelaksanaan ujian ke 10% sampel saringan murid secara mingguan dengan kaedah penggiliran bagi tempoh Disember 2021 hingga Januari 2022.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 09 DISEMBER 2021 (KHAMIS)

SOALAN

TUAN PANG HOK LIONG [LABIS] minta **MENTERI KEWANGAN** menyatakan jumlah hasil cukai yang telah dikutip oleh Kerajaan dari syarikat-syarikat yang terlibat dalam industri perjudian, jualan empat nombor ekor, alkohol dan rokok bagi setiap tahun dari tahun 2010 hingga 2020.

JAWAPAN

Tuan Yang di-Pertua,

Untuk makluman ahli Yang Berhormat, hasil cukai secara keseluruhan yang telah dikutip oleh Kerajaan daripada industri perjudian, produk minuman keras dan produk rokok dan tembakau dari tahun 2010 sehingga tahun 2020 adalah sebanyak RM82.48 bilion di mana komponen terbesar adalah dari produk rokok dan tembakau.

Tuan Yang di-Pertua,

Secara umumnya, barang-barang yang dikategorikan sebagai *demerit goods* dengan izin, seperti minuman keras, rokok dan produk tembakau dikenakan cukai tidak langsung yang terdiri daripada duti import, duti eksais dan cukai jualan. Manakala aktiviti perjudian dikenakan cukai tidak langsung yang terdiri daripada cukai perjudian, duti pertaruhan, duti kasino dan duti mesin perjudian. Pengenaan duti atau cukai yang tinggi bagi produk-produk tersebut adalah bertujuan untuk mengimbangi *negative externalities* dengan izin, yang wujud kesan daripada pengambilan produk dan aktiviti yang tidak digalakkan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN BARU BIAN [SELANGAU]
TARIKH : 9 DISEMBER 2021 (KHAMIS)

SOALAN

TUAN BARU BIAN [SELANGAU] minta **MENTERI KEWANGAN** menyatakanapakah peratusan cukai yang dikutip oleh Jabatan Hasil Dalam Negeri diberi rebat atas pembayaran sebagai zakat sejak 10 tahun yang lalu. Adakah Kerajaan mempunyai rancangan untuk memberi rebat ke atas sumbangan yang dibuat kepada rumah ibadat bukan Islam atas semangat 'Keluarga Malaysia'.

JAWAPAN

Tuan Yang Di-Pertua,

Untuk makluman Ahli Yang Berhormat, bagi tempoh 2011 hingga 2020, purata peratusan cukai yang diberi tolakan rebat zakat adalah sebanyak 30% dengan purata pembayar cukai yang menuntut rebat zakat sebanyak 23.9% dari jumlah pembayar.

Ahli Yang Berhormat, membayar zakat merupakan suatu kewajipan kepada orang Islam dengan pendapatan yang mencukupi syarat tertentu. Namun, membayar cukai dan zakat daripada sumber pendapatan yang sama akan membebankan pembayar cukai beragama Islam. Oleh itu, Kerajaan telah memberikan rebat zakat ke atas jumlah cukai pendapatan yang perlu dibayar bagi mengurangkan beban tersebut. Pemberian rebat zakat ini hanyalah terhad kepada amaun cukai yang perlu dibayar sahaja.

Sungguhpun begitu, Kerajaan turut menyediakan layanan potongan cukai sehingga 10% daripada pendapatan agregat penyumbang bagi sumbangan tunai kepada Tabung Pembelian Rumah Ibadat, Tabung Pembinaan Rumah Ibadat atau Tabung Pengurusan Rumah Ibadat yang ditubuhkan oleh rumah ibadat Islam dan bukan Islam dan mendapat kelulusan di bawah subseksyen 44(6) Akta Cukai Pendapatan 1967. Selain itu juga, semua rumah ibadat diberikan pengecualian cukai pendapatan dan dari mengemukakan borang cukai agar tidak membebankan pengoperasian sesuatu rumah ibadat.

Oleh yang demikian, layanan cukai yang disediakan oleh Kerajaan kepada pembayar cukai sama ada beragama Islam dan bukan Islam berhubung pembayaran zakat dan sumbangan kepada rumah ibadat masing-masing adalah menyeluruh dan saksama berdasarkan kewajipan di bawah agama masing-masing.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN NGA KOR MING [TELUK INTAN]
TARIKH : 09 DISEMBER 2021 (KHAMIS)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan secara terperinci satu per satu berapa jumlah kos sebenar yang telah dibelanja oleh Kerajaan sepanjang tempoh proklamasi darurat bermula dari 11 Januari hingga 1 Ogos 2021.

JAWAPAN

Tuan Yang di-Pertua,

Setakat 31 Ogos 2021, iaitu berakhirnya tempoh darurat, sejumlah 207 bilion ringgit telah dibelanjakan. Ini merangkumi 146.5 bilion ringgit dibelanjakan di bawah anggaran perbelanjaan mengurus (atau OE) dan sejumlah 40 bilion dibelanjakan di bawah anggaran perbelanjaan pembangunan (atau DE) Kerajaan Persekutuan. Manakala sejumlah 20.5 bilion ringgit lagi telah dibelanjakan di bawah Kumpulan Wang Covid-19 (atau KWC).

Perbelanjaan OE, DE dan KWC ini merupakan sebahagian daripada Belanjawan 2021 bernilai 322.5 bilion ringgit dan dibuat berdasarkan kepada peruntukan yang telah diluluskan oleh Parlimen di bawah Anggaran Perbelanjaan Persekutuan bagi tahun 2021. Sehubungan itu, tiada perbelanjaan tambahan telah dibuat di bawah OE atau DE semasa tempoh darurat yang perlu dibentangkan di Dewan

Rakyat kerana ianya menggunakan peruntukan semasa yang telah diluluskan bagi tahun 2021.

Selain itu, Kerajaan telah meluluskan ordinan semasa tempoh darurat yang membolehkan perbelanjaan tambahan diluluskan oleh Kementerian Kewangan tanpa di bentangkan kepada Parlimen. Namun demikian, ordinan tersebut tidak digunakan untuk tahun 2021 tetapi hanya digunakan untuk meluluskan tambahan 2020.

Di samping perbelanjaan OE dan DE, Kerajaan juga telah membiayai langkah pakej bantuan dan rangsangan melalui KWC. Pada 31 Disember 2020, Parlimen telah meluluskan pindaan siling KWC sehingga 65 bilion ringgit dan setakat 31 Ogos 2021, perbelanjaan terkumpul sejak penubuhan KWC adalah berjumlah 58.8 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
(SIMPANG RENGAM)**

TARIKH : 9 DISEMBER 2021 (KHAMIS)

SOALAN

DR. MASZLEE BIN MALIK (SIMPANG RENGAM) minta **MENTERI KANAN PENDIDIKAN** menyatakan apakah Kerajaan akan menyediakan pelan pendidikan terangkum jangka masa panjang pasca COVID-19 merangkumi pendidikan dasar, pendidikan tinggi, TVET dan juga pendidikan prasekolah. Apakah Kerajaan bersedia untuk melibatkan semua pihak merentasi politik, kepartian dan kepakaran seperti mana yang telah dititahkan oleh DYMM YDPA.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19.

Untuk makluman Ahli Yang Berhormat, sekolah telah mula dibuka pada 3 Oktober 2021 secara berfasa setelah ditutup untuk satu tempoh yang panjang. Pembukaan semula sekolah ini membolehkan murid yang telah lama renggang dengan persekitaran persekolahan kembali semula ke sekolah. Pembukaan sekolah secara bersemuka dilaksanakan berdasarkan satu pelan komprehensif bagi memastikan murid dapat kembali belajar di

sekolah dalam keadaan selamat. Pelan komprehensif ini turut melibatkan pengoperasian institusi pendidikan lain seperti kolej matrikulasi dan Institut Pengajian Guru (IPG). Dalam merangka pelan ini, KPM telah mengadakan sesi libat urus yang menyeluruh bagi mendapatkan pandangan dan cadangan daripada semua pihak berkepentingan. Libat urus melibatkan pentadbir sekolah, guru Persatuan Ibu Bapa dan Guru (PIBG), murid dan kumpulan pakar daripada sektor kesihatan awam, pendidikan, psikologi kanak-kanak dan pediatrik.

KPM juga telah membuat analisis terperinci mengenai amalan terbaik pembukaan semula sekolah di negara-negara lain bagi meneliti pendekatan yang berkesan dalam pengoperasiannya. Pelan ini kemudiannya diperincikan bersama-sama Kementerian Kesihatan Malaysia dan Majlis Keselamatan Negara serta diselarikan dengan Pelan Pemulihan Negara.

KPM telah membuat ketetapan untuk melanjutkan sesi persekolahan tahun 2021 sehingga bulan Mac tahun 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesianaan murid untuk mengikuti tahun persekolahan berikutnya.

KPM memberi fokus kepada keperluan murid untuk mengukuhkan pembelajaran dalam tempoh pasca pandemik. Untuk itu, KPM telah memperkenalkan program pemerksaan pelaksanaan kurikulum iaitu KPMPerkasaKU. Program ini adalah salah satu usaha untuk membantu memperkukuh kemahiran asas literasi dan numerasi serta memperkasa penguasaan murid dalam mata pelajaran lain berdasarkan kurikulum kebangsaan. Program KPMPerkasaKU dilaksanakan dari peringkat sekolah rendah hingga sekolah menengah sebagai *catch-up plan* yang bertujuan untuk:

- i. meningkatkan penguasaan murid bagi kandungan kurikulum tahun semasa secara optimum;
- ii. merapatkan jurang pembelajaran murid yang wujud semasa krisis;
- iii. menyediakan bahan sokongan kurikulum kepada guru bagi melaksanakan pengajaran dan pembelajaran; dan

- iv. memastikan murid bersedia mengikuti kurikulum tahun persekolahan 2022.

Untuk makluman Ahli Yang Berhormat, KPM sentiasa komited untuk terus memperkasakan pendidikan TVET yang ditawarkan di kolej vokasional (KV), sekolah menengah teknik (SMT), dan juga program vokasional di sekolah menengah harian. Fokus TVET KPM adalah untuk melahirkan modal insan berteraskan kemahiran, kepakaran, pengiktirafan dan pengalaman di industri. Langkah tersebut adalah untuk meningkatkan kebolehpasaran serta mobiliti sebagai pekerja yang memenuhi keperluan industri. KPM komited bagi memastikan program TVET KPM dilaksanakan dengan memenuhi pembangunan latihan yang komprehensif, pensijilan yang diiktiraf oleh pelbagai pihak terutama pihak industri serta pengetahuan yang tinggi dalam bidang yang berkaitan.

KPM sentiasa terbuka untuk menerima sebarang cadangan daripada semua pihak dalam memastikan sistem pendidikan kebangsaan akan terus dapat dioperasikan dengan berkesan dan mencapai matlamat yang dihasratkan. Ini adalah selaras dengan konsep Keluarga Malaysia yang mementingkan aspek keterangkuman, kebersamaan dan kesyukuran.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN PANG HOK LIONG [LABIS]
TARIKH : 09 DISEMBER 2021 (KHAMIS)

SOALAN

TUAN PANG HOK LIONG [LABIS] minta **MENTERI KEWANGAN** menyatakan sama ada benar pihak Kerajaan telah mengutip lebih kurang RM200 juta daripada kegunaan sistem uCustoms walaupun sistem bernilai RM397.43 juta itu gagal disiapkan sehingga kini sejak ia dimulakan pada Oktober 2013 dan Kerajaan sudah membayar sejumlah RM272 juta kepada syarikat terpilih, Brilliance Information Sdn. Bhd.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan kepada laporan terimaan hasil daripada kegunaan sistem uCustoms, hasil yang telah diperakaunkan dari tahun 2017 sehingga tahun 2020 adalah sebanyak 221,714,426 ringgit. Manakala bayaran yang telah dibuat kepada syarikat Brilliance Information Sdn. Bhd., iaitu pembekal sistem berkenaan, adalah sebanyak 263,890,546 ringgit dalam tempoh yang sama, tidak termasuk GST mahupun SST.

Sebagaimana Ahli Yang Berhormat sedia maklum, perkara berhubung pelaksanaan projek uCustoms ini telah dibangkitkan dalam Laporan Ketua Audit Negara dan kini dalam peringkat prosiding Jawatankuasa Kira-Kira Wang Negara atau PAC. Sekian, terima kasih.